

柳州府志卷之十三

城池

易稱王公設險以固其國而後之言地利者山國用山城即以川澤為池土國用土城即以溝澮為池皆祖設險之義取以捍外而衛內者也柳郡城垣素稱雄壯若子厚詩云城上高樓接大荒是矣近復營築完固屹如金湯其牂牁之水自西北來環遶三隅噴激東注此非人力亦可謂天塹矣哉

志城池

柳州府志 卷之十三 城池

一

馬平縣

附郭

府城唐宋時俱係土城至元祐間知柳州畢君卿重築在江北舊州咸淳初徙州治於龍江南今柳城縣地迄元俱無城郭明洪武元年遷府治於馬平四年縣丞唐叔建始築土城十二年指揮蘓銓等拓之易以磚東西三里南北二里高一丈八尺周圍七百四十八丈窩舖四十五間堞口九百三十七個為門五東門西門鎮南門靖南門北門城外水環如帶明嘉靖二十四年總制張襄惠公平

五都蠻乃以餘餉奏築外羅城起西環北東首尾皆際江長五百九十丈高一丈四尺為三門東曰賓曦正北曰拱辰西曰照臨明末圯

國朝康熙五年守道戴璣知府劉永清知縣閩興邦修內城康熙五十三年大水傾西南隅增築以石雍正三年總督孔毓珣捐俸委官修築乾隆三年知府吳秉正詳請動正項錢糧三萬兩委馬平知縣張本闡重修

雒容縣舊土城在洛清鄉白龍巖明景泰間為賊

攻陷天順中徙於朱岢成化間僉事何漢宗改砌以石上覆串樓正德時為猺獞所據嘉靖二年十一月復巡按御史汪淵重修萬歷三年古田上油岢賊平四年正月遷於靈塘即今地築磚城

國朝康熙五十三年知縣王符震雍正六年知縣馬樸俱重修周圍二百九十四丈五尺高一丈二尺堞口五百九十七個設四門西南門樓各一後東北二門塞雍正五年知縣馬樸以東為生氣所聚開東門其北門仍塞雍正十一年知縣張本闡捐

建東樓

柳城縣城在龍江南元為府治明洪武元年遷治龍江東二年縣丞陳祖政始建土城成化間都御史韓雍委知府何楚英築磚城

國朝順治十四年知縣張冕康熙十年知縣翟廉三十年知縣彭士櫝五十五年知縣周祖武雍正七年知縣周之瑚俱各重修高一丈五尺濶一丈二尺周圍三百五十丈二尺堞口八百二十為門三南曰石城西曰西江北曰鎮北又有外羅城週圍

柳州府志

卷之十三

城池

三

四百餘丈為三門係明嘉靖萬歷間知縣邱雲霄  
佘光裕創建今圯

羅城縣城明成化十七年府同知劉類知縣艾俊始砌石城在鳳凰山之陽高一丈二尺濶四尺餘周圍三百六十丈正德七年知縣黃裳建東西南三門樓三座東曰覽輝西曰永安南曰迎薰因地多石未鑿池嘉靖三十六年推官周賓興知縣徐鏗重修明季傾圯

國朝康熙三年知縣于成龍重修城樓城東一面砌

石立磚堞餘三面方議修補會陞去任三十三年  
知縣王永清重修乾隆二十五年知縣胡位鑄復  
葺三門城樓

融縣城建自唐時至宋安撫使譚壽昌廢舊城拓  
東南北三面創外城周圍九里為門三曰通濟鎮  
遠威武為樓三日朝陽清遠雄邊元至正間寇陷  
權本州同知劉士學重修之明初於城北拓廣二  
十餘丈環之以濠又增建城門曰廣潤天啟七年  
復加營治

柳州府志

卷之十三

城池

四

國朝康熙十九年知縣熊飛渭捐貲修葺西南二門  
城樓窩舖九間四十八年知縣吳從龍重修廣潤  
四門五十二年知縣牛天宿募民修築後因霪雨  
雉蝶譙樓半就傾塌雍正八年知縣陸嘉謨詳請  
估修今城高二丈五尺堞口六百七十周圍四百  
八十五丈門有四大東小東南門西門池深一丈  
八尺濶一丈二尺

懷遠縣城明洪武十四年始建於大容江口老堡  
地嘉靖隆慶中猺賊陷城者再論者以縣城孤懸

賊巢非形勝制馭久安之所萬歷十九年知縣蘓朝陽始遷於丹陽鎮地磬石奠基上砌以磚高一丈七尺周圍二百六十丈門四皆有樓東門曰歡雷樓曰就日南門曰丹陽樓曰薰風西門曰新良樓曰太白北門曰治定樓曰向宸南北築月城二座馬道上蓋瓦舖八座銃臺四座皆有樓屋城外築土城六百丈開四門上蓋瞭望樓環城四面皆水不為池濠周圍三百三十九丈堞口五百六十六今已百有餘年城漸圯

象州舊土城明洪武間始築開東西南北四門又開小南門尋塞成化十四年守禦都指揮楊觀於四門上各建樓一座嘉靖九年知州林益請於總制林富發公帑撤舊串樓改砌磚石萬歷十三年知州李維岳重開小南門改曰進賢建樓一座後圯

國朝康熙六十年知州江峩重建迨後城垣城樓各處傾懷知州陸廷光捐葺乾隆六年城西門圯知州沈嘉徵修并建門樓三間二十年知州蔣曰萊

重修今城高一丈八尺濶一丈周圍五千九百五十丈堞口一千六百四十五城門五東曰賓陽南曰鎮南西曰朝江北曰象臺小南門曰進賢池濶二丈五尺深一丈  
來賓縣土城明洪武時始築永樂間縣丞孫仕安改建磚城西南濱河東北倚山為門四東曰東安西曰西清南曰鎮南北曰迎恩各建譙樓並串樓景泰間燬於寇天順四年巡撫葉盛令修復之明末圯

國朝康熙六年知縣李日芳重建北城樓五十六年知縣盧御龍重建西城樓雍正二年知縣李定重建東城樓十三年知縣劉大綱改建南樓於城隍廟而以舊城樓為文昌閣乾隆八年知縣王蒼重修十四年西城圯知縣湯奕濬捐築今城高一丈八尺濶一丈五尺周圍五百一十丈堞口七百有四十池深一丈五尺廣亦如之